

## RADIO E.C.C.A.

---

Unha oferta educativa para adultos

*José Carlos Otero López*  
Profesor de E.X.B.

### ¿QUE É RADIO ECCA?

Radioensino ECCA é un Centro de Educación de Adultos en réxime de administración especial que ten por finalidade primordial a promoción cultural das persoas que, no seu momento e por diversas razóns, non tiveron a oportunidade de cursar estudos académicos regulados ou para dar resposta á demanda cultural das persoas adultas que reclaman unha formación sociocultural encamiñada ó mundo laboral e profesional e máis concretamente para quen pretende aproximarse a un posto de traballo, onde cada día se pide un maior grao de preparación e un máis alto nivel de coñecementos.

O Centro ECCA-Galicia foi aprobado polo Decreto 945/1975 (BOE 6-5-75), estando a base xurídico-docente fundamentada no Convenio establecido entre a Fundación ECCA e a Xunta de Galicia (proporciona profesores en Comisión de Servicio) para impartilo GRADUADO ESCOLAR, así como un amplo abano de cursos que o configuran

como un Centro Público de Educación Permanente de Adultos.

Radio ECCA-Galicia comezou as súas actividades en Vigo para máis tarde estenderse ás catro provincias galegas. Actualmente, os centros están ubicados en Pontevedra-Vigo (con emisora propia F.M. 96,5), Lugo-Monforte (que emite por Radio Cadena Española), na Coruña (emitindo a través de Radio Popular) e Ourense (que recolle os sinais radiofónicos de Vigo).

## Ubicación das sedes centrais do centro E.C.C.A. en Galicia

---

### A CORUÑA

- Centro ECCA  
R/ Rafael Alberti, 9-1º A  
15008 A CORUÑA  
Teléf. (981)29.36.58
- Centro ECCA  
C.P. Ibáñez Martín  
Vivendas Protexidas  
FERROL. Teléf. (981)31.07.65

### LUGO

- Centro ECCA  
Garaballa de Arriba, s/n  
Albeiros  
Apartado 221  
27080 LUGO  
Teléf. (982)21.60.01

### OURENSE

- Centro ECCA  
R/ Rúa de Ensinanza, 12  
32002 OURENSE  
Teléf. (988)25.38.76

### PONTEVEDRA

- Centro ECCA  
R/ Andrés Mellado, 2-1º  
36001 PONTEVEDRA  
Teléf. (986)84.57.37
- Centro ECCA  
R/ Velázquez Moreno, 9-1º  
36201 VIGO (PONTEVEDRA)  
Teléf. (986)22.73.15
- Centro ECCA  
Rúa E., 14 baixo  
LALIN (PONTEVEDRA)  
Teléf. (986) 783744

## O SISTEMA PEDAGÓXICO DESTA TECNOLOXÍA EDUCATIVA

---

O sistema de ensino radiofónico pretende chegar a miles de persoas que polas súas ocupacións profesionais, por problemática familiar, por deficiente formación anterior ou polas distancias xeográficas, teñen dificultades de acceder a centros de formación convencional.

A peculiaridade da tecnoloxía ECCA é que concibe a ensinoaprendizaxe coma un conxunto de elementos interrelacionados entre sí, é dicir, coma un sistema que ten que supli-la distancia física do profesor/alumno cuns medios que fagan o ensino autenticamente personalizado.

Para acadar este obxectivo o sistema apóiase en tres piares complementarios e fundamentais:

- A clase radiofónica.
- Os esquemas a base de textos mutilados.
- As clases presenciais con Profesores Orientadores.

### A clase radiofónica

---

A radio é o piar fundamental deste sistema de ensino, cunha función estrictamente docente que conduce todo o proceso de aprendizaxe. A clase radiofónica é impartida por unha parella de mestres que teñen que ter moi clara a idea de que van supli-la súa presenza na aula só coa voz e a través das ondas. Por iso teñen que ser uns profesionais espe-

ciais que necesitan unha boa preparación para ir guiando ó alumno coas súas explicacións e a través do esquema, non deixando a radio soa, senón que deberán integrala nun conxunto que interactúa cos outros dous elementos que configuran o sistema.

As explicacións dos profesores radiofónicos teñen que estar dotadas dunha excelente vocalización e unha gran fluidez de ideas para dar unha sensación de cercanía, facendo que o alumno sinta que ten o profesor realmente na súa casa, adiviñando as súas dúbidas, os seus posibles momentos de distracción e adiantándose ós seus pensamentos. As clases deberán ser eminentemente activas, a través dunha minuciosa explicación dos contidos que aparecen nos esquemas, cun proceso do fácil ó difícil, do concreto ó abstrato, procurando espertar en todo momento o interese polo tema, mantendo ó alumno ocupado, subliñando textos, facendo exercicios, etc.

A duración das clases radiofónicas é de 1 hora diaria para os cursos de Pregraduado e Graduado Escolar e de media hora para os cursos monográficos e de Aula Aberta.

### Os esquemas de traballo

Os esquemas, elaborados por un equipo pedagóxico, son o soporte para seguir as clases radiofónicas, o que poderíamos chama-lo taboleiro, e están confeccionados a base de textos mutila-

dos e moitos debuxos que fan ameno o seu uso.

Estes esquemas entréganselle ó alumno no Centro ECCA para que lle sirvan de caderno de exercicios e de apoio para realiza-las tarefas pedagóxicas. Ó remate do curso o alumno atópase cun libro de texto que el mesmo foi confeccionando.

Ademais destes esquemas, tamén se proporciona material complementario: antoloxías, apuntes técnicos, bibliografía, etc.

### As clases presenciais

Estas lévanse a cabo nos chamados Centros de Orientación repartidos ó longo de toda a xeografía galega, cun Profesor Orientador á fronte de cada un deles.

O Profesor Orientador, ademais do mestre que resolve as dúbidas pedagóxicas, debe ser un bo animador de grupo que ofrezca ó alumno un apoio moral e social, potenciando actividades extraescolares, tales como: grupos de teatro, coros, equipos deportivos, etc.

Os Centros de Orientación, ubicados xeralmente en colexios públicos, casas da cultura dos concellos ou locais de asociacións de veciños serven de lugar de encontro entre os alumnos que seguen o mesmo curso. Alí clarifican as dúbidas que lles xurdiron ó longo da semana, recollen o material impreso,

intercambian opinións e ofrecen suxestións para transmitir ós profesores gravadores. Incluso funcionan como lugar de recollida de noticias culturais da cada zona para logo darlle a oportuna difusión pola emisora.

Estes centros son moi numerosos e a distancias moi curtas entre eles (4 ou 5 kilómetros), incluso por barrios e parroquias, facilitando así a asistencia do alumno ás clases presenciais sen que lle supoña moito esforzo de desprazamento.

### SISTEMA DE AVALIACION E RENDIMIENTO DO ALUMNO

O sistema de avaliación dentro do ensino ECCA ten uns matices adaptados á LOXSE, onde, ademáis de cualificar ó alumno de forma obxectiva, preténdese tamén orienta-lo seu proceso de ensino/aprendizaxe, valora-las súas capacidades e avalialo en función dos propios intereses do alumno a través dun proceso individualizado.

Ó ser este un Centro Público de Educación Permanente de Adultos, recórrase á avaliación continuada como medio para cualifica-los coñecementos teóricos. Para acadar unha calificación o máis obxectiva posible, téñense en conta os seguintes aspectos:

- Asistencia ás orientacións semanais ou clases presenciais controladas polos profesores orientadores a través de sinaturas.

- Exercicios de composición escrita realizados polo alumno no seu domicilio e corrixidos semanalmente polo profesor orientador.

- Autoavaliacións feitas polo propio alumno co apoio posterior dos cadros de corrección facilitados polo profesor orientador.

- Avaliacións presenciais a base de probas escritas sobre as materias que compoñen o currículo escolar realizadas no centro de orientación.

Actualmente estase poñendo en práctica un novo sistema de estudos para a obtención do Graduado Escolar, cun proxecto modular e unha avaliación por créditos, mediante o que o alumno adquire unha formación xeral obrigatoria xunto cunha formación opcional que o acerque ó seu mundo social, familiar, laboral e comunitario. Con este novo sistema de ensino, o alumno pode elixi-lo seu propio currículo escolar nos módulos que son opcionais; así obtense unha maior flexibilidade no currículo, onde o adulto pode acceder ou abandona-lo estudio despois de rematar un módulo obtendo a certificación e créditos acumulables correspondentes; o alumno atopa as materias seleccionadas e organizadas por contidos afíns, recibe sempre estes contidos por "paquetes" máis facilmente asimilables.


Con este novo sistema modular Radio ECCA pretende acercarse a un Currículo moderno, flexible e sobre todo

máis cercano á psicoloxía do adulto que vai máis alá dunha formación académica para encamiñarse a unha formación ocupacional e sociocultural que lle permite desenvolverse con máis soltura nunha sociedade cada día máis esixente e competitiva.



## O ALUMNADO DE ECCA

A continuación recóllese de forma esquematizada o perfil do alumno que segue os seus estudos no Centro ECCA. Como se pode comprobar, a procedencia, profesións, coñecementos previos e idades son variables totalmente heteroxéneas.



## O PROFESORADO DE ECCA

O labor pedagóxico realízano Profesores de EXB funcionarios da Xunta de Galicia e nomeados en Comisión de Servicio no Centro ECCA.

O contacto directo semanal cos alumnos realízano os Profesores Orientadores, que conforman un amplo grupo distribuído nunha ampla rede xeográfica.

### Cadro de persoal

As prazas de profesores destinados en comisión de servicio pola Xunta de Galicia cóbrense por medio dun concurso de méritos entre os profesores de EXB funcionarios que o solicitan.

A misión deste profesorado é fundamentalmente a coordinación do sistema e o control dos profesores orientadores das distintas zonas, así como confeccionar esquemas, adaptacións dos temas, apertura de centros de orientación e seguimento dos mesmos, tramitación burocrática, relacións públicas con institucións, asociacións, etc.

O cadro actual de persoal é o seguinte

PROVINCIA	PROF. CADRO PERSOAL	PROF. ORIENTAD.	CENTROS ORIENT.
A CORUÑA	6	26	53
LUGO	3	11	13
OURENSE	2	17	12
PONTEVEDRA	11	66	62
TOTAIS	22	120	140

## Profesores orientadores

Este é un profesorado voluntario e altruista que só actúa unha vez por semana, para facerse cargo das clases presenciais nos Centros de Orientación, pero sempre baixo a tutela dos profesores do cadro de persoal.

Todos eles son Profesores de EXB titulados, que están encargados de animar, dinamizar, orientar, avaliar e facilitar-lo material impreso ós alumnos, ademais de face-la promoción na súa zona, aclarar-las dúbidas do alumnado e potenciar actividades lúdicas entre os alumnos, tales como grupos de teatro, equipos deportivos, excursións, etc.

## OFERTA EDUCATIVA DE RADIO ECCA

Dentro da oferta educativa deste Centro distinguimos uns cursos académicos de educación formal regulada, encamiñados á consecución dun título oficial como é o Graduado Escolar ou BUP (só en Canarias) co obxectivo de dar unha segunda oportunidade a todas aquelas persoas que no seu momento non tiveron a oportunidade de obter estes títulos, e outros cursos non académicos ou monográficos que pretenden unha formación continuada no ámbito social e profesional.

ENSINANZA	CURSO	DURACION	TITULACION
ACADEMICOS	* Pregraduado * Graduado E. * BUP	1 Curso 1 Curso 3 Cursos	C. Escolaridade Graduado E. Bacharel
NON ACADEMICO	* Inglés * Contabilidade * Galego Inic * Galego Perf * Escola Pais	3 Cursos 2 Cursos 60 horas 60 horas 2 Cursos	Diploma Diploma Certificac. " Diploma
MONOGRAFICOS	* Saúde I * Saúde II * Animación S * Animador G. * Est.Precoz * Téc. Estudio * E. Consumo * Ortografía * Elaboración de Unidades Didácticas * Informática * Traballo e Lexislación Laboral * Etc. Etc.	25 Horas 25 Horas 45 Horas 20 horas 30 horas 2 semans 20 clases 6 semáns 20 clases  10 clases  40 horas	Diploma Diploma Diploma Diploma Diploma Diploma Diploma Diploma Diploma  Diploma  Diploma